

Dasar ekonomi Melayu baharu jamin kesaksamaan

➔ Usaha ke arah pemodenan, depani cabaran Revolusi Industri 4.0

Oleh Zanariah Abd Mutalib
zanariah_mutalib@bh.com.my

Putrajaya

Kerajaan akan menggubal satu dasar ekonomi Melayu baharu yang berteraskan pertumbuhan,

menjamin kesaksamaan dan perkongsian kemakmuran, bagi mendepani cabaran ekonomi semasa.

Menteri Hal Ehwal Ekonomi, Datuk Seri Mohamed Azmin Ali, berkata dasar itu mencerakan semangat keterangkuman dan nilai keadilan untuk dikongsi seluruh rakyat Malaysia.

Bela hak, kepentingan Melayu, Bumiputera

“Saya mendukung komitmen Perdana Menteri, Tun Dr Mahathir Mohamad yang menegaskan bahawa Pakatan Harapan (PH) tuntas membela hak dan kepentingan masyarakat Melayu serta Bumiputera,” katanya dalam satu kenyataan, semalam.

Mohamed Azmin berkata, dalam menerajui usaha ke arah

pemodenan ekonomi berasaskan teknologi terkini dan berdepan cabaran Revolusi Industri 4.0, kementeriannya akan memulakan siri perbincangan dan libat urus bersama pemegang taruh utama dalam sektor ekonomi.

Ini termasuk dewan perniagaan, syarikat berkaitan kerajaan (GLC), badan bukan kerajaan (NGO) serta pakar ekonomi.

“Dengan berkat perpaduan rakyat yang rencam untuk menjayakan agenda ini, insyaAllah, ekonomi negara akan kembali gagah dan mampu bersaing dalam pasaran global,” katanya.

Selain itu, Mohamed Azmin berkata lawatan kerja beliau ke Kelantan minggu lalu membuka lembaran baharu dalam usa-

ha memperkukuh hubungan Kerajaan Persekutuan dan negeri terutama menyuburkan semangat federalisme bagi melonjakkan ekonomi rakyat, khususnya masyarakat desa.

Gembleng usaha

“Susulan usaha ini, Kementerian Hal Ehwal Ekonomi akan terus mengembleng usaha mengangkat martabat warga FELDA dan pekebun kecil yang sedang bergelut dengan masalah legasi pentadbiran yang lalu.

“Untuk maksud itu, kerajaan memperhalusi inisiatif baharu yang lebih proaktif demi menjamin kemampuhan sektor perladangan dan pertanian, sekali gus meningkatkan pendapatan serta kuasa beli masyarakat desa,” katanya.